



REPUBLIKA E SHQIPËRISË  
**KËSHILLI I EMËRIMEVE NË DREJTËSI**

**VENDIM**  
**Nr. 46, datë 28.10.2022**

**PËR VLERËSIMIN DHE PIKËZIMIN E KANDIDATURËS SË ZOTIT GENTI  
IBRAHIMI NË VENDIN VAKANT PËR GJYQATAR NË GJYKATËN  
KUSHTETUESE, SHPALLUR NGA PRESIDENTI I REPUBLIKËS NË DATËN  
13.01.2022**

Këshilli i Emërimeve në Drejtësi, i përbërë nga :

Sokol Binaj	Kryetar
Marsida Xhaferllari	Zëvendëskryetare
Anila Leka	Anëtare
Elsa Toska	Anëtare relatore
Edlira Petri	Anëtare
Enton Dhimitri	Anëtar
Etien Kapo	Anëtar
Klodiana Mema	Anëtare
Genti Xholi	Anëtar zëvendësues

Asistuar nga sekretare Fabiola Muhameti, me praninë e përfaqësuesit të Avokatit të Popullit, z. Enio Haxhimihali, në cilësinë vëzhguesit të përhershëm të mbledhjeve dhe veprimtarisë së Këshillit të Emërimeve në Drejtësi (KED), në mungesë të përfaqësuesve të autorizuar të subjekteve të ftuara sipas ligjit për pjesëmarrje, në mbledhjen e datës 28.10.2022, mori në shqyrtim çështjen që i përket:

**KANDIDAT PËR GJYQATAR  
NË GJYKATËN KUSHTETUESE: Z. Gent Ibrahimi**

**OBJEKTI: Vlerësimi dhe pikëzimi i kandidaturës së Z.  
Genti Ibrahimi, në vendet vakante për  
gjyqtar në Gjykatën Kushtetuese, të shpallur  
nga Presidenti i Republikës në datën  
13.01.2022,**

**KËSHILLI I EMËRIMEVE NË DREJTËSI**

Pasi dëgjoi relatimin e anëtarëve relatorë të Këshillit, znj. Elsa Toska, mendimin e paraqitur nga përfaqësuesi i Avokatit të Popullit, z. Enio Haxhimihali, në cilësinë e vëzhguesit të përhershëm në mbledhjen dhe veprimtarinë e Këshillit të Emërimeve në Drejtësi, lidhur me mënyrën e procedimit të ndjekur për verifikimin e kandidatit, dhe si bisedoi çështjen në tërësi,

## VËREN:

### I. Rrethanat e çështjes

1. Këshilli i Emërimeve në Drejtësi, me Vendimin Nr. 42, datë 14.10.2022 ka vendosur lejimin e kandidimit të kandidatit z. Genti Ibrahim i për gjyqtar në Gjykatën Kushtetuese, në vendin vakant të shpallur nga Presidenti i Republikës, në datën 13.01.2022, për plotësimin e vendit vakant të krijuar në Gjykatën Kushtetuese pas mbarimit të mandatit të ish-gjyqtarit Përparim Kalo.

2. Në zbatim të dispozitave të ligjit Nr. 8577/2000 dhe të ligjit Nr. 115/2016, si edhe atyre të Kreut IV (pikat 27-38) të vendimit Nr. 5 datë 02.04.2019 *“Për kriteret dhe procedurën e vlerësimit, pikëzimit dhe renditjes së kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”*, anëtarja e Këshillit, znj. Elsa Toska, në cilësinë e relatorit, ka realizuar veprimet përgatitore të procedurës së vlerësimit dhe pikëzimit të kandidatës z. Genti Ibrahim, njëkohësisht me procedurat e verifikimit të tyre.

3. Në datën 17.10.2022, Këshilli i Emërimeve në Drejtësi nëpërmjet rrugës elektronike, ka njoftuar kandidatin Genti Ibrahim, duke i bërë me dije, ndër të tjera se: *“...Referuar përcaktimeve të ligjit nr. 115/2016 i ndryshuar, si dhe vendimit nr. 5, datë 02.04.2019 “Për kriteret dhe procedurën e vlerësimit, pikëzimit dhe renditjes së kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, krahas shqyrtimit dhe vlerësimit në tërësi, përcaktohet një vlerësim edhe më i posaçëm mbi 5 dokumente pune të paraqitura nga kandidati. Për këtë arsye, kërkohet që të depozitoni pranë Sekretarisë së Këshillit të Emërimeve në Drejtësi, si dhe në rrugë elektronike 5 dokumentet që ky Këshill do të referojë dhe do të marrë në vlerësim sipas përcaktimeve të vendimit nr. 5, datë 02.04.2019 të sipërcituar. Për sa më sipër, jeni i lutur që brenda ditës së mërkurës datë 19.10.2022 të depozitoni pranë KED aktet e kërkuara. Ky komunikim, së bashku me përgjigjen tuaj do të jetë pjesë përbërëse e akteve të procedurës së vlerësimit”*.

4. Në datën 17.10.2022, kandidati Gent Ibrahim i ka komunikuar nëpërmjet formës elektronike Këshillit të Emërimeve në Drejtësi se: *“...do t’ju lutesha të më jepni disa sqarime të mëtejshme lidhur me 5 dokumentet e punës. Nuk jam i qarte se çfarë kërkohet konkretisht”*.

5. Me e-mailin e datës 18.10.2022, Këshilli i Emërimeve në Drejtësi ka bërë me dije kandidatin se: *“...Në lidhje me kërkesën tuaj për sqarime rreth 5 dokumenteve që duhet të paraqisni pranë Këshillit të Emërimeve në Drejtësi, ju bëjmë me dije se duhet të mbani në vëmendje kërkesat e pikës 32 të Vendimit nr. 5, datë 02.04.2019 “Për kriteret dhe procedurën e vlerësimit, pikëzimit dhe renditjes së kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”. në të cilin përcaktohet qartësisht se: “Lista e dokumenteve që kandidati dorëzon në kopje origjinale ose të vërtetuar sipas ligjit përfshin: a) jetëshkrimin e përditësuar me të dhënat deri në kohën e dorëzimit sipas pikës 31 të këtij Vendimi, të hartuar sipas formatit të përcaktuar nga Këshilli; b) dokumentin që përshkruan motivimin e kandidimit dhe objektivat nëse emërohet; c) pesë dokumente profesionale të përzgjedhura nga vetë kandidati për vlerësim sipas metodologjisë profesionale të miratuar nga Këshilli; ç) dokumente të tjerë që shërbejnë për vlerësimin e*

kandidatit, sipas përcaktimeve orientuese në Shtojcën nr. 1 ose Shtojcën nr. 2 të këtij Vendimi, në zërin “Burimet e Vlerësimit”, për secilën kategori dhe kriter të vlerësimit. d) deklarimin, nëse zotëron, të njohurive në gjuhë të huaja, të shoqëruar nëse i disponon me dokumente përkatëse vërtetuese të lëshuar nga subjekte publike ose private të specializuara”. Bazuar sa më sipër, Këshilli kërkon që nga ana juaj të paraqisni në formë elektronike edhe platformën e përditësuar që përshkruan motivimin e kandidimit tuaj si dhe objektivat nëse do të emëroheni. Gjithashtu, pavarësisht sa më sipër, ju bëjmë me dije se në zbatim të procedurave të vlerësimit dhe metodologjisë, të cilat rregullohen sipas parashikimeve të vendimit nr. 5, datë 04.04.2019 të sipërcituar, jeni i lutur që të bëni prezent brenda ditës së sotme, datë 18.10.2022 në rrugë elektronike, nëse pranoni të intervistoheni edhe në komponentin e vlerësimit të gjuhës së huaj dhe, së dyti, në cilën gjuhë të huaj të deklaruar prej jush do të preferoni të intervistoheni. Ky komunikim, së bashku me përgjigjen tuaj do të jetë pjesë përbërëse e akteve të procedurës së vlerësimit”.

6. Në datën 18.10.2022 kandidati nëpërmjet rrugës elektronike i ka bërë me dije Këshillit të Emërimeve në Drejtësi se: “...Ju faleminderit për shpjegimet. Ju bej me dije se jam i gatshëm të intervistohem edhe në komponentin e gjuhës së huaj. Preferoj të intervistohem në gjuhën angleze. Së fundi do t'ju lutesha të më dërgoni me e-mail një kopje të letrës së motivimit të dorëzuar në KED në momentin e aplikimit....”.

7. Në datën 19.10.2022 kandidati Genti Ibrahim, i ka komunikuar Këshillit të Emërimeve në Drejtësi se: “...në vijim të email-it tuaj (shih më poshtë), po dërgoj në rrugë elektronike 5 dokumente pune (libra dhe studime) për të mundësuar vlerësimin e kandidaturës time. Ju faleminderit”.

8. Po në datën 19.10.2022, Këshilli i Emërimeve në Drejtësi ka njoftuar Kandidatin Genti Ibrahim, duke i bërë me dije se: “...Në vijim të procedurës së vlerësimit dhe pikëzimit sipas përcaktimeve të Vendimit nr. 5, datë 02.04.2019 “Për kriteret dhe procedurën e vlerësimit, pikëzimit dhe renditjes së kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, Këshilli i Emërimeve në Drejtësi gjatë mbledhjes së sotme datë 19.10.2022, vendosi që të caktojë zhvillimin e seancës dëgjimore dhe intervistimin e kandidatëve në gjuhën e huaj, ditën e mërkurë datë 26.10.2022, ora 14.00. Për sa më sipër, jeni i lutur që të merrni masa për tu paraqitur personalisht në ambientet e Gjykatës së Lartë në datën 26.10.2022, ora 14.00...”.

9. Bazuar sa më sipër, në bazë të pikës 4 dhe 5 të nenit 125 të Kushtetutës, pikave 2 dhe 3 të nenit 7/a të Ligjit nr. 8577/2000 “Për organizimin dhe funksionimin e Gjykatës Kushtetuese”, nenit 228 pika 5, nenit 239 dhe 240 të Ligjit nr. 155/2016 “Për organet e qeverisjes së sistemit të drejtësisë” dhe pikave 36 e 38 të Vendimit nr. 5, datë 02.04.2019 “Për kriteret dhe procedurën e vlerësimit, pikëzimit dhe renditjes së kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, relatorja Elsa Toska, duke u bazuar në aktet që janë dorëzuar nga kandidati në momentin e kandidimit si dhe gjatë fazës përgatitore të procedurës së vlerësimit, ka vijuar procedurën hetimore hartuar relacionin përkatës.

10. Në përfundim të procedurave të verifikimit të kandidates z. Gent Ibrahim, relatorja znj. Elsa Toska ka njoftuar Kryetarin dhe ka paraqitur për shqyrtim në mbledhjen e Këshillit, relacionin dhe dokumentacionin e përgatitur për kandidaten e vendit vakant lidhur me procedurën e përzgjedhjes dhe vlerësimit të kandidaturave.

11. Në datën 24.10.2022, Këshilli i Emërimeve në Drejtësi i ka komunikuar kandidatit Genti Ibrahimi, në rrugë elektronike përmes e-mailit se: *"...Për efekt të procedurës së vlerësimit dhe pikëzimit, ju duhet të paraqisni pranë Këshillit të Emërimeve në Drejtësi certifikatat apo dëshmitë që vërtetojnë ndjekjen e këtyre trajtimeve. Gjithashtu, në jetëshkrimin (CV ) e dorëzuar pranë KED, ju keni bërë evident faktin se zotëroni edhe gjuhën Italiane. Lutemi që për efekt të procedurës së pikëzimit, të paraqisni pranë Këshillit të Emërimeve në Drejtësi edhe dëshminë apo certifikatën e njohjes së gjuhës italiane. Gjithashtu, nga dokumentacioni i paraqitur nga ana juaj, ka rezultuar se ju keni ndjekur studimet pasuniversitare në programin "Master" pranë Universitetit të Evropës Qendrore, Zyra e të Dhënave Statistikore, për të drejtën kushtetuese, për periudhën 1 shtator 1992 - 30 Qershor 1993, me note mesatare të studimeve B. Për efekt të procedurës së vlerësimit dhe pikëzimit, duhet të paraqisni pranë Këshillit të Emërimeve në Drejtësi dokumentacionin me të cilin provoni njohjen e diplomës për studimet pasuniversitare sipas legjislacionit në fuqi. Dokumentacionin e kërkuar si mësipër, duhet ta paraqisni brenda ditës së nesërme, datë 25.10.2022, si dhe jo me vonë se ditën që Këshilli të marrë në vlerësim dhe pikëzim kandidaturën tuaj...."*

12. Po në rrugë elektronike, kandidati Genti Ibrahimi në datë 24.10.2022, i ka bërë me dije Këshillit të Emërimeve në Drejtësi se: *"...Lidhur me pikën 1, bashkëngjitur do të gjeni certifikatat përkatëse; Lidhur me pikën 2, Ju bëj me dije se nuk disponoj certifikatë për njohjen e gjuhës italiane. Sidoqoftë jam i gatshëm të intervistohem në gjuhën Italiane; Lidhur me pikën 3, Ju bëj me dije se dokumentacioni që provon kryerjen e programit Master në Universitetin e Evropës Qendrore është dorëzuar në KED në formën e kërkuar nga ligji. Në vitin 1993 nuk kishte bazë ligjore për akreditimin e studimeve jashtë vendit dhe për pasojë nuk disponoj akreditim. Për efekte të vlerësimit, studimet e mia 1 vjeçare në të Drejtën Kushtetuese pranë Universitetit të Evropës Qendrore duhet të konsiderohen studime të specializuara afatgjata...."*

13. Këshilli i Emërimeve në Drejtësi, pasi shqyrtoi procedurat e ndjekura gjatë veprimeve përgatitore nga relatorja e çështjes, tërësinë e dokumentacionin të paraqitur për vlerësim nga kandidati Gent Ibrahimi, dëgjoi mendimin e Avokatit të Popullit lidhur me mënyrën e procedimit të ndjekur për përgatitjen e dokumentacionit të kandidatës, ka vendosur fillimin e procedurave të vlerësimit, pikëzimit dhe renditjes së kandidatëve të lejuar për vendet vakante, si më poshtë:

- a) Vendi vakant për gjyqtar në Gjykatën Kushtetuese, shpallur nga Presidenti i Republikës, në datën 13.01.2022

14. Sipas kalendarit të intervistave dhe listës së ekspertëve për gjuhët e huaja të miratuar, në datën 26.10.2022, ka zhvilluar procedurën e intervistës me kandidatët e lejuar, mbi motivimin e kandidimit dhe nivelin e zotërimit të gjuhëve të huaja, për vendin vakant në Gjykatën Kushtetuese, të treguar në pikën 7 të këtij Vendimi.

15. Intervista mbi motivimin e kandidimit dhe nivelin e zotërimit të gjuhëve të huaja me kandidatin e lejuar, Z. Gent Ibrahimi, kandidat për vendin vakant në Gjykatën Kushtetuese, u zhvillua në datën 26.10.2022.

16. Lidhur me nivelin e zotërimit të gjuhëve të huaja nga kandidati i lejuar, Z. Genti Ibrahimi, në vijim të bisedës së zhvilluar gjatë intervistës, Këshilli i është paraqitur edhe mendimi me shkrim nga ekspertja znj. Etleva Kondi, pedagoge e brendshme e gjuhës angleze, Fakulteti i Gjuhëve të Huaja, Universiteti i Tiranës.

## II. Vlerësimi i Këshillit të Emërimeve në Drejtësi

17. Në përfundim të intervistës, bazuar në të dhënat e nxjerra nga biseda mbi motivimin e kandidimit, mendimin e ekspertës për nivelin e zotërimit të gjuhëve të huaja, si edhe bazuar në aktet dhe dokumentet që janë dorëzuar nga kandidati Z. Genti Ibrahimimi në momentin e paraqitjes së kërkesës për kandidim, dokumente të paraqitura prej saj sipas kërkesave të Këshillit, si edhe shkresa dhe të dhëna të tjera kërkuara apo të ardhura zyrtarisht nga institucione të ndryshme, Këshilli ka vënë në bisedim vlerësimin dhe pikëzimin e kandidates Z. Genti Ibrahimimi për secilin nga kriteret e vlerësimit të përcaktuara:

- a) në pikën 4 dhe 5 të nenit 125 të Kushtetutës;
- b) në nenin 7/a të ligjit Nr. 8577/2000 “Për organizimin dhe funksionimin e Gjykatës Kushtetuese të Republikës së Shqipërisë”, të plotësuar, për aq sa nuk përcaktohet ndryshe në këto dispozita, me kriteret e përgjithshme të vlerësimit të parashikuara në nenin 240 të ligjit Nr. 115/2016;
- c) në detajimin e mëtejshëm të kriterëve ligjore të posaçme dhe të përgjithshme të vlerësimit dhe përcaktimit më të hollësishëm të peshës specifike të tyre në pikëzimin dhe renditjen e kandidatëve të treguar në Kreun II, në Kreun V dhe në Shtojcën 1 të Vendimit Nr. 5 datë 02.04.2019 “Për kriteret dhe procedurën e vlerësimit, pikëzimit dhe renditjes së kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”;
- d) në shpjegimet e hollësishme lidhur me metodologjinë mbi të cilin bazohet në vlerësimi dhe caktimi i pikëve të miratuar nga Këshilli i Emërimeve në Drejtësi me vendimin Nr. 51 datë 21.06.2019 “Për miratimin e metodologjisë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese”.

### A. Meritat profesionale – Historiku Arsimor dhe Profesional

#### *Vjetërsia në profesion*

18. Në shkronjën “a” të pikës 3 të nenit 7/a të ligjit Nr. 8577/2000, përcaktohet si kriter vlerësimi “Vjetërsia në profesion”. Ndërkohë që, sipas nenit 125 të Kushtetutës dhe nenit 7/a pika 2 shkronja “a” të ligjit Nr. 8577/2000, përbën kusht lejimi kandidimi që kandidati të ketë së paku 15 vjet përvojë profesionale si gjyqtarë, prokurorë, avokatë, profesorë ose lektorë të së drejtës, nëpunës (jurist) të nivelit të lartë në administratën publike.

19. Prandaj, Këshilli vlerëson me pikë kohëzgjatjen për më shumë se 15 vjet të këtyre fushave të përvojës profesionale të secilit kandidat, në maksimum deri në 4 pikë, sikurse orientohet në tabelën e përshkallëzuar të pikëzimit të vjetërsisë në profesion të treguar në Metodologjinë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese, të miratuar me vendimin nr. 51, datë 21.06.2019.

20. Sipas jetëshkrimit dhe dokumentacionit të administruar në procedurën e verifikimit të kandidaturës dhe në kuadër të veprimeve përgatitore të procedurës së vlerësimit, rezulton që kandidati Z. Genti Ibrahimimi, ka ushtruar veprimtaritë profesionale si më poshtë:

- a) Për periudhën 1993 deri 1996, Pedagog efektiv i së drejtës, Lënda E Drejtë Administrative. ( 3 vjet e 6 muaj)

- b) Për periudhën Maj 1995 deri në 30 Shtator 1997, Administrator i Programit për Shtetin e së Drejtës në Fondacionin “Shoqëria e Hapur për Shqipërinë” (Soros) (gjithsej 2 vjet e 4 muaj);
- c) Për periudhën nga data 01.10.1997 deri në datën 15.03.1999, Këshilltar ligjor në Kabinetin e Ministrit të Shtetit për Reformën Legjislative dhe Marrëdhëniet me Kuvendin (pranë Këshillit të Ministrave) (gjithsej 1 vit, 5 muaj e 15 ditë);
- d) Për periudhën nga data 15.03.1999 deri në datën 15.06.1999, Drejtor i Kabinetit të Ministrit të Shtetit për Reformën Legjislative dhe Marrëdhëniet me Kuvendin (pranë Këshillit të Ministrave) (gjithsej 3 muaj);
- e) Për periudhën nga data 31.03.1999 deri në datën 11.10.2007, Drejtor Ekzekutiv i Fondacionit “Instituti për Studime Publike dhe Ligjore” (gjithsej 8 vjet, 6 muaj 11 ditë).
- f) Për periudhën nga data 11.10.2007 deri në datën 13.02.2013, jurist pranë Fondacionit “Instituti për Studime Publike dhe Ligjore” (gjithsej 5 vjet, 5 muaj dhe 3 ditë).
- g) Për periudhën nga data 13.02.2013 deri në datën 17.12.2018, Drejtor Ekzekutiv i Fondacionit “Instituti për Studime Publike dhe Ligjore” (5 vjet, 10 muaj dhe 4 ditë).
- h) Për periudhën Shtator 2007 deri në Dhjetor 2013, anëtar i Këshillit Kombëtar të Radio Televizionit (sot Autoriteti i Mediave Audiovizive) (gjithsej 6 vjet e tre muaj);
- i) Për periudhën nga data 19.12.2018 deri në momentin e kandidimit në datë 02.02.2022, anëtar dhe njëkohësisht Kryetar i Këshillit të Lartë të Prokurorisë (gjithsej 3 (tre) vjet, 1 (një) muaj dhe 14 ditë);
- j) Janar 2015 e vijim Pedagog/Trajner i së Drejtës Shkolla e Magjistraturës. Për periudhën, vitin akademik 2015-2016 ekspert i jashtëm në Shkollën e Magjistraturës, ndërsa nga data 21.12.2016 e në vijim pedagog i jashtëm në Shkollën e Magjistraturës. (gjithsej 5 vjet si titullar lënde/pedagog i jashtëm dhe për periudhën vjetore akademike 2015-2016 si ekspert i kontraktuar nga Shkolla e Magjistraturës, angazhim mbi baza ditore, (referojuni pasqyrës së kurseve për vitin akademik 2015-2016 me nr. 760/1 prot., datë 28.12.2015 dhe pasqyrës së kurseve për vitin akademik 2016-2017, pasqyruar me shkresën nr. 1134/1 prot., 07.11.2016). Referuar vërtetimit nr.671, prot, të datës 2.08.2022 të Shkollës së Magjistraturës, kandidati ka qenë i miratuar në rolin e ekspertit në trajnimet e zhvilluara nga Shkolla e Magjistraturës në kuadër të Programit të Formimit Vazhdues për aktivitetet sipas viteve. 2003-2004, 2010-2011, 2015-2016,2016-2017, 2017-2018,2018-2019,2019-2020.

21. Mbështetur në të dhënat e sipërcituara, rezulton se kandidati Genti Ibrahim, në momentin e përpilimit të relacionit të vlerësimit (datë 21.10.2022), ka gjithsej **29 vjet e 1 muaj** vjetërsi në profesion si jurist dhe përvojë në fushën e të drejtave dhe lirive themelore të njeriut. Ndërsa, vjetërsi në profesion si nëpunës i nivelit të lartë në administratën publike, dhe në fushën e veprimtarive të tjera profesionale sipas përcaktimeve të nenit 125 të Kushtetutës dhe nenit 7/a të ligjit nr. 8577/2000, referuar momentit të kandidimit, datë **02.02.2022**. Këshilli ka pasur vlerësime të ndryshme, referuar pikëzimeve të anëtarëve.

22. Për këto arsye, për kriterin e vlerësimit “vjetërsia në profesion”, Këshilli çmoi ta vlerësojë kandidatin Z. Gent Ibrahim me **2, 22 (dy presje njëzet e dy) Pikë**.

### ***Historiku Arsimor***

23. Në shkronjën “d” të pikës 3 të nenit 7/a të ligjit Nr. 8577/2000, përcaktohet si kriter vlerësimi edhe ecuria gjatë kryerjes së arsimit të lartë me një notë mesatare jo më pak se 8 ose të barasvlefshme me të, ndërkohë që edhe shkronja “c” e pikës 1 të nenit 240 të ligjit Nr. 115/2016 kërkon të vlerësohen rezultatet gjatë studimeve në ciklet e arsimit të lartë.

24. Prandaj, Këshilli vlerëson me pikë ecurinë gjatë kryerjes së arsimit të lartë me një notë mesatare jo më pak se 8 ose të barasvlefshme me të të secilit kandidat, sipas përshkallëzimit me 1 pikë të notës mesatare mbi 8 dhe me 2 pikë të notës mesatare mbi 9, sikurse orientohet në Metodologjinë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese, të miratuar me vendimin Nr. 51 datë 21.06.2019.

25. Sipas jetëshkrimit dhe dokumentacionit të administruar në procedurën e verifikimit të kandidaturës dhe në kuadër të veprimeve përgatitore të procedurës së vlerësimit, rezulton që kandidati Z. Gent Ibrahimi ka përfunduar studimet dhe është diplomuar në vitin 1992 si “*Jurist*”, në Fakultetin e Drejtësisë, Universiteti i Tiranës, i cili vlerësohet si diplomë e nivelit të dytë.

26. Në bazë të certifikatës së notave të lëshuar nga Fakulteti i Drejtësisë, Universiteti i Tiranës rezulton se ka përfunduar studimet universitare me notë mesatare 9.67, ndërsa sipas vetëdeklarimit të bërë nga kandidati Genti Ibrahimi rezulton se ka përfunduar studimet universitare me notë mesatare 9.675.

27. Për këto arsye, për kriterin e vlerësimit “historiku arsimor”, nisur nga nota mesatare 9.67 e arritur gjatë studimeve dhe diplomimit në Fakultetin e Drejtësisë, Universiteti i Tiranës si dhe studimeve pasuniversitare, Këshilli çmoi ta vlerësojë kandidatin Genti Ibrahimi me **2 (dy) Pikë**.

### ***Kualifikime Pasuniversitare***

28. Në pikën 3 të nenit 7/a të ligjit Nr. 8577/2000 dhe pikat 1 e 4 të nenit 240 të ligjit Nr. 115/2016, si edhe në vendimin Nr. 5 datë 02.04.2019 të Këshillit të Emërimeve në Drejtësi të nxjerrë në bazë e për zbatim të ligjit, përcaktohen si kriter vlerësimi pasja e titujve akademikë, gradave shkencore, ecuria dhe kryerja kualifikimeve pasuniversitare, studimeve dhe specializimeve afatgjata (përfshirë Shkollën e Magjistraturës), si edhe kryerja e trainimeve afatgjata dhe afatshkurtra në fushën e të drejtave kushtetuese, të drejtave të njeriut, si edhe në fusha të tjera të së drejtës.

29. Prandaj, në zbatim të ligjit, Këshilli i Emërimeve në Drejtësi vlerëson me pikë llojin e titujve akademikë dhe gradave shkencore, llojin, kohëzgjatjen, fushën dhe vendin e kryerjes së kualifikimeve pasuniversitare, studimeve, specializimeve dhe trainimeve të kandidatëve, duke pasur parasysh shpërndarjen e pikëve sipas vendimit Nr. 5 datë 02.04.2019 të këtij Këshilli, si edhe orientimet që përmbahen në Metodologjinë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese, të miratuar me vendimin Nr. 51 datë 21.06.2019.

30. Sipas jetëshkrimit dhe dokumentacionit të administruar në procedurën e verifikimit të kandidaturës dhe në kuadër të veprimeve përgatitore të procedurës së vlerësimit, rezulton që kandidati Genti Ibrahimi ka ndjekur kualifikime pasuniversitare, konkretisht ka ndjekur

studimet pasuniversitare në programin “Master” pranë Universitetit të Europës Qendrore, Zyra e të Dhënave Statistikore, për të drejtën kushtetuese, për periudhën 1 shtator 1992 - 30 Qershor 1993, me notë mesatare të studimeve B.

31. Për këto arsye, për kriterin e vlerësimit të “Kualifikime Pasuniversitare”, Këshilli çmoi ta vlerësojë kandidatin Genti Ibrahimimi me **2,27 (dy presje njëzet e shtatë) Pikë**.

32. Sipas jetëshkrimit dhe dokumentacionit të administruar në procedurën e verifikimit të kandidaturës dhe në kuadër të veprimeve përgatitore të procedurës së vlerësimit, rezulton që kandidati Genti Ibrahimimi ka ndjekur 8 (tetë) veprimtari trajnimi afatshkurtra. Tematika e këtyre trajnimeve kanë qenë të ndryshme. Për trajnimet e kryera kandidati Genti Ibrahimimi ka depozituar pranë Këshillit diplomat dhe certifikatat përkatëse.

33. Duke pasur parasysh numrin, llojin, kohëzgjatjen dhe tematikat e veprimtarive trainuese të ndjekura nga kandidati Genti Ibrahimimi, Këshilli për këtë kriter ligjor vlerësimi, çmoi ta vlerësojë me **1,55 (një presje pesëdhjetë e pesë) Pikë**.

#### ***Njohja e gjuhëve të huaja***

34. Në shkronjën “c” të pikës 4 të nenit 240 të ligjit Nr. 115/2016, si edhe në vendimin Nr. 5 datë 02.04.2019 të Këshillit të Emërimeve në Drejtësi të nxjerrë në bazë e për zbatim të ligjit, përcaktohet si kriter vlerësimi niveli i zotërimit të gjuhëve të huaja.

35. Prandaj, në zbatim të ligjit, Këshilli i Emërimeve në Drejtësi vlerëson me pikë llojin dhe numrin e gjuhëve të huaja, si edhe nivelin e zotërimit të tyre nga ana e kandidatëve, duke pasur parasysh sasinë e pikëve maksimale përkatëse sipas vendimit Nr. 5 datë 02.04.2019 të këtij Këshilli, si edhe orientimet që përmbahen në Metodologjinë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese, të miratuar me vendimin Nr. 51 datë 21.06.2019.

36. Sipas jetëshkrimit dhe dokumentacionit të administruar në procedurën e verifikimit të kandidaturës dhe në kuadër të veprimeve përgatitore të procedurës së vlerësimit, rezulton që kandidati Genti Ibrahimimi zotëron gjuhët e huaja: Italisht dhe Anglisht. Sipas deklaratimit të kandidatit niveli i zotërimit të gjuhës të huaj është “shumë i mirë” në të tre komponentët: të kuptuarit, të folurit dhe me shkrim. Për asnjë nga gjuhët e huaja kandidati nuk ka paraqitur dokumente që provojnë njohjen e gjuhës.

37. Gjithashtu, gjatë intervistës së zhvilluar me Këshillin në datën 26.10.2022, për verifikimin e shkallës së zotërimit të gjuhës angleze, kandidati z. Genti Ibrahimimi zhvilloi edhe bisedën me ekspertin e zgjedhur nga Këshilli, pedagogen Etleva Kondi. Në mendimin me shkrim të depozituar pranë Këshillit, ekspertja e njohurive të gjuhës angleze ka ardhur në përfundimin se kandidati z. Genti Ibrahimimi “zotëron shumë mirë gjuhën angleze.”, duke sugjeruar vlerësimin me **3 (tre) Pikë**.

38. Për sa më lart, Këshilli çmoi ta vlerësojë kandidatin z. Gent Ibrahimimi për këtë kriter ligjor vlerësimi, në total me **3, 55 (tre presje pesëdhjetë e pesë) pikë**.

#### ***B. Meritat profesionale – Kualifikimi i Përgjithshëm Profesional***

39. Në shkronjën “ç” të pikës 3 të nenit 7/a të ligjit Nr. 8577/2000 dhe në shkronjën “a” të pikës 1 të nenit 240 të ligjit Nr. 115/2016, si edhe në vendimin Nr. 5 datë 02.04.2019 të



Këshillit të Emërimeve në Drejtësi të nxjerrë në bazë e për zbatim të ligjit, në lidhje me kualifikimin e përgjithshëm profesional, përcaktohen si kritere vlerësimi, në bazë të treguesve shkencorë, performanca e dalluar dhe rezultatet e larta në ushtrimin e profesionit, që mbështetet ndërmjet të tjerave në botimet dhe artikujt shkencorë në fushën juridike, në produktet profesionale sipas profileve të ushtrimit të profesionit, rezultatet e vlerësimit profesional dhe të etikës të kandidatëve në punët që kanë bërë në të shkuarën, nëse ka, ose rezultatet e dallueshme të arritura gjatë përvojave të tyre të punës e që lidhen me ushtrimin e funksioneve në fushën përkatëse.

40. Prandaj, në zbatim të ligjit, Këshilli i Emërimeve në Drejtësi vlerëson me pikë si sasinë ashtu edhe cilësinë e rezultateve profesionale, me një fokus të veçantë tek cilësia. Në këtë mënyrë, bazuar në të dhënat e mundshme të disponueshme për vlerësim, mbahen parasysh sasia e pikëve maksimale prej 30 pikësh sipas vendimit normativ Nr. 5 datë 02.04.2019 të këtij Këshilli, si edhe orientimet për caktimin e mundshëm të një maksimumi prej 25 pikësh për sa i përket vlerësimit cilësor dhe të një maksimum prej 5 pikësh për vlerësimin e sasisë së rezultateve profesionale sipas Metodologjisë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese, të miratuar me vendimin Nr. 51 datë 21.06.2019.

41. Në rastin e kandidatit z. Genti Ibrahim, Këshilli shqyrtoi dokumente profesionale dhe të dhënat që mund të disponoheshin nga veprimtaria e tij profesionale si jursit i spikatur, si edhe nga kontributet e tjera profesionale të këtij kandidati në veprimtari të ndryshme, përfshirë publikime apo punime e artikuj shkencorë.

42. Për sa i përket vlerësimit sasior, krahas të dhënave që rezultojnë nga jetëshkrimi dhe dokumentacioni i paraqitur nga vetë kandidati, Këshilli nuk ka administruar kë të dhëna për përcaktimin e ngarkesës sasimore të këtij kandidati.

43. Gjithashtu, nga dokumentacioni i administruar rezulton se kandidati Genti Ibrahim, në cilësinë e autorit apo bashkëautorit, ka përgatitur disa publikime profesionale të cituara si më poshtë:

- Komentar “Mbi Reformën kushtetuese në Sistemin e Drejtësisë”, bashkautor, botuar nga Instituti për Studimet Publike & Ligjore, 2019;
- Komentar Elektronik i Legjislacionit të Sistemit të Drejtësisë, kontribuues, EURALIUS V, botuar në vitin 2018;
- “Gjykata Europiane dhe Liria e Shprehjes”, bashkautor, “Mbi Reformën kushtetuese në Sistemin e Drejtësisë”, bashkautor, botuar nga Instituti për Studimet Publike & Ligjore, 2007;
- “Gjyqësori në Optikën e Përdoruesve të tij”, bashkëautor, botuar nga Instituti për Studimet Publike & Ligjore, viti 2007;
- “Gjykimi i Drejtë dhe të Drejtat e Njeriut në procesin gjyqësor”, bashkautor, botuar nga Instituti për Studimet Publike & Ligjore, viti 2006.
- “Partneritetet në kontekstin e Policimit në Komunitet”, bashkautor, botuar nga Instituti për Studimet Publike & Ligjore, viti 2013.
- “Liria e Shprehjes. Ligji dhe Praktika Gjyqësore”, bashkautor, botuar nga Instituti për Studimet Publike & Ligjore e, viti 2003.
- Komentar “Ligji për të drejtën e informimit”, bashkautor, botuar nga Instituti për Studimet Publike & Ligjore, viti 2003.
- Komentar “Kodi i Procedurave Administrative”, bashkautor, botuar nga Studimet Publike & Ligjore, viti 2004.

- “Gjykata Europiane dhe të Drejtat e Fëmijeve”, bashkautor, botuar nga Instituti për Studimet Publike & Ligjore, viti 2017.
- “Gjykata Europiane dhe e Drejta për Jetë Private”, bashkautor, botuar nga Instituti për Studimet Publike & Ligjore, viti 2012.
- “Përmbledhje e standardeve të Gjykatës Europiane për të Drejtat e Njeriut mbi Shpifjen”, bashkautor, botuar nga Instituti për Studimet Publike & Ligjore, viti 2015.
- “Komentar për Ligjin për organizatat jofitimprurëse”, bashkautor, botuar nga Instituti për Studimet Publike & Ligjore, viti 2003;
- “Etika Gjyqësore” Tekst Mësimor. Bashkautor, botuar nga Instituti Gjyqësor i Kosovës viti 2008

44. Mbështetur në këto të dhëna të rezultateve në ushtrimin e detyrës, si dhe në tematikën e përmbajtjen e produkteve profesionale të lidhura me ushtrimin e detyrës apo edhe me ushtrimin e profesionit, Këshilli vlerëson se në aspektin sasior kandidati Genti Ibrahim ka tregues të angazhimit profesional, i cili rezulton të jetë mbi një angazhim të zakonshëm apo “mesatar” në ushtrimin e profesionit. Për këto arsye, Këshilli çmoi ta vlerësojë kandidatin Genti Ibrahim për këtë kriter ligjor vlerësimi me **4,33 (katër presje tridhjetë e tre) Pikë**.

45. Për sa i përket vlerësimit cilësor, Këshilli shqyrtoi të dhënat që rezultojnë nga jetëshkrimi dhe dokumentacioni i paraqitur nga vetë kandidati Genti Ibrahim, veçanërisht pesë prej dokumenteve të përzgjedhura prej tij, me synimin për të evidentuar, bazuar në tregues shkencorë, elementë që dëshmojnë arritjen e rezultateve profesionale, shkallën e këtyre arritjeve, përfshirë elementë që nga këto dokumente profesionale dhe në tërësi nga veprimtaria profesionale e kandidatit dëshmojnë dallueshmërinë e tij në kuptimin dhe qëllimin për të cilin Kushtetuta dhe ligji e përcakton si kusht për vlerësimin e kandidaturës për këtë Këshill dhe, më tej, për përzgjedhjen e gjyqtarit të Gjykatës Kushtetues nga organet e emërtesës.

46. Në veprimet përgatitore të kryera gjatë procedurave të verifikimit të kandidaturës, fillimisht në datën 17.10.2022, kandidati Genti Ibrahim ka njoftuar Këshillin me shkrim se për qëllimet e procedurës së vlerësimit në kuadër të pikëzimit për “Kualifikimin e Përgjithshëm Profesional” dhe “Kualifikimin Shtesë Profesional”, ka përzgjedhur pesë dokumentet profesionale si më poshtë:

- Dokument Teknik “Opinion rreth ligjit ‘Për deklarimin dhe kontrollin e pasurive, detyrimet financiare të të zgjedhurve dhe disa nëpunësve publikë’ të Republikës së Shqipërisë dhe rreth amendamenteve të propozuara”, punuar nga Gent Ibrahim, Këshilltar Afatgjatë i PACA-s, Korrik 2010;
- Gjykata Europiane dhe e Drejta për jetë private; bashkautor, botuar nga Instituti për Studimet Publike & Ligjore, viti 2012.
- Vlerësimi i Ndryshimeve të Kodit të Procedurave Penale dhe Kodit të Procedurave i Autoriteteve Kompetente mbi Imunitetet e Zyrtarëve Publikë, përgatitur nga Gent Ibrahim, Korrik 2014;
- Hetimi dhe ndjekja e veprave penale të Korrupsionit në Shqipëri. Vlerësim dhe Rekomandime, Bashkautor Gent Ibrahim dhe Quentin Reed, Dhjetor 2014;
- Komentar “Mbi Reformën Kushtetuese në Sistemin e Drejtësisë”, bashkautor, botuar nga Instituti për Studimet Publike & Ligjore, 2019;

47. Në lidhje me tërësinë e dokumenteve profesionale të paraqitura nga kandidati Genti Ibrahim dhe, në veçanti, lidhur me 5 (pesë) dokumentet profesionale të sipërcituara, për realizimin e vlerësimit profesional dhe të pikëzimit përkatës për këtë kriter ligjor vlerësimi,

Këshilli shqyrtoi dhe bisedoi në mënyrë të posaçme dhe të kujdesshme përmbajtjen e tyre, duke u mbështetur mbi indikatorë shkencorë, sikurse janë edhe ato të përmendura në Shtojcën Nr. 1 të vendimit sipas vendimit Nr. 5 datë 02.04.2019 të këtij Këshilli, si edhe orientime që përmbahen në Metodologjinë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese, të miratuar me vendimin Nr. 51 datë 21.06.2019.

48. Dokumentet profesionale të shqyrtuara trajtojnë tematika të ndryshme të fushës së të drejtës.

49. Njëri ndër indikatorët vlerësues të dokumenteve profesionale është *“Origjinaliteti dhe/ose impakti (duke përfshirë kontrollin për plagjiaturë) të dokumentit”*. Nisur nga profilet profesionale të kandidatit Genti Ibrahim, përmbajtja e dokumenteve të analizuara, tematikës dhe dobisë së përdorimit të tyre nga profesionistë të fushës por edhe nga grupe interesi dhe publiku i gjerë, Këshilli vëren se dokumentet profesionale të shqyrtuara, sikurse edhe në rastin e një numri publikimesh shkencore dhe artikujsh profesionalë, dëshmojnë qasje profesionale origjinale dhe të thelluara të çështjeve ligjore të përzgjedhura për trajtim, për të cilat jo vetëm në kohën e publikimit por edhe aktualisht ka një interes të veçantë për njohje dhe zbatim. Për rrjedhojë, krahas origjinalitetit në përzgjedhjen e tematikave dhe trajtimin e tyre duke sjellë argumente dhe përfundime me interes, vërehet edhe dobishmëria dhe impakti pozitiv i këtyre punimeve në praktikën gjyqësore, në zhvillimin e debatit profesional e doktrinal, si edhe njohjen e të drejtave nga publiku më i gjerë, përfshirë edhe për qëllimet praktike të përdorimit të ligjit në rastet kur mund të pretendojnë njohjen apo kërkojnë mbrojtjen e të drejtave dhe lirive themelore.

50. Për rrjedhojë, pas shqyrtimit dhe analizës mbi dokumentacionin profesional të paraqitur, në lidhje me treguesin *“Origjinaliteti dhe/ose impakti (duke përfshirë kontrollin për plagjiaturë) të dokumentit”*, Këshilli e vlerëson kandidatin Genti Ibrahim me **5,44 (pesë presje dyzet e katër) Pikë**.

51. Për sa i përket treguesit vlerësues të lidhur me *“Aftësitë analitike”*, Këshilli vëren se posaçërisht pesë dokumentet profesionale të shqyrtuara, sikurse edhe në rastin e një numri publikimesh shkencore dhe artikujsh profesionalë, kandidati Genti Ibrahim tregon zotërimin e aftësive të dallueshme për të analizuar informacione dhe për të identifikuar, arsyetuar dhe zbatuar konceptet ligjore, parimet dhe institutet e së drejtës, dispozitat e së drejtës pozitive në trajtimin e çështjeve dhe problematikave që përbëjnë tematikën e punimeve dhe dokumenteve, sipas natyrës dhe qëllimit të vetë këtyre punimeve.

52. Për rrjedhojë, pas shqyrtimit dhe analizës mbi dokumentacionin profesional të paraqitur, në lidhje me treguesin *“Aftësitë analitike”*, Këshilli e vlerëson kandidatin Genti Ibrahim me **5,77 (pesë presje shtatëdhjetë e shtatë) Pikë**.

53. Në lidhje me treguesin vlerësues *“Aftësitë kërkimore”*, Këshilli shqyrtoi veçanërisht pesë dokumentet profesionale të përzgjedhura nga kandidati Genti Ibrahim, sikurse edhe publikime shkencore dhe artikujt profesionalë të paraqitur në dosjen e kandidates. Nga ky shqyrtim, Këshilli vëren se këto punime përmbajnë informacione të larmishme profesionale të përdorura dhe të lidhura efektivisht me natyrën, qëllimin dhe përmbajtjen e secilit prej punimeve të shqyrtuara, të nxjerra nga burime të ndryshme të doktrinës dhe praktikës gjyqësore vendase, si edhe prej atyre të shteteve të ndryshme dhe të institucioneve e gjykatave ndërkombëtare.

54. Për rrjedhojë, pas shqyrtimit dhe analizës mbi dokumentacionin profesional të paraqitur, në lidhje me treguesin “*Aftësitë kërkimore*”, Këshilli e vlerëson kandidatin Genti Ibrahimimi me **3,88 (tre presje tetëdhjetë e tetë) Pikë**.

55. Sipas treguesit “*Saktësia dhe precizoni*”, në thelb, verifikohet nëse në veprimtarinë e tyre profesionale, kandidatët kanë mbuluar me profesionalizëm tematikën e përzgjedhur dhe materiali ka shmangur përsëritjet apo citimet e panevojshme etj. Nga shqyrtimi i dokumenteve profesionale të përzgjedhura nga kandidati Genti Ibrahimimi, sikurse edhe i publikimeve shkencore dhe artikujve profesionalë të paraqitur në dosjen e kandidatit, Këshilli vëren se këto punime tregojnë nivel të shumë të lartë të përcaktimit të tematikës dhe problemeve juridike për analizë dhe zgjidhje, përdorim të pasur dhe korrekt të terminologjisë juridike dhe strukturim e përdorim në mënyrën dhe vendin e duhur të gjetjeve nga legjislacioni, doktrina, si edhe praktika gjyqësore shqiptare dhe e huaj.

56. Për rrjedhojë, pas shqyrtimit dhe analizës mbi dokumentacionin profesional të paraqitur, në lidhje me treguesin “*Saktësia dhe precizoni*”, Këshilli e vlerëson kandidatin Genti Ibrahimimi me **4,44 (katër presje dyzet e katër) Pikë**.

57. Në lidhje me treguesin vlerësues “*Qartësia*”, Këshilli shqyrtoi pesë dokumentet profesionale të përzgjedhura nga kandidati Genti Ibrahimimi, sikurse edhe publikime shkencore dhe artikujt profesionalë të paraqitur në dosjen e kandidatit. Këshilli vëren se në këto punime janë të organizuara dhe strukturuara në mënyrën e duhur, gjuha e përdorur është e pasur por njëkohësisht edhe korrekte, e thjeshtë dhe e një niveli të lartë profesional. Pasuria, qartësia e gjuhës së përdorur dhe organizimi i duhur i materialit i bëjnë këto punime të kuptueshme dhe të lexueshme, sipas natyrës së punimit dhe grupeve të interesit të cilave synon ti drejtohet.

58. Për rrjedhojë, pas shqyrtimit dhe analizës mbi dokumentacionin profesional të paraqitur, në lidhje me treguesin “*Qartësia*”, Këshilli e vlerëson kandidatin Genti Ibrahimimi me **3,77 (tre presje shtatëdhjetë e shtatë) Pikë**.

59. Pas shqyrtimit dhe analizës së pesë indikatorëve të mësipërm që përbëjnë vlerësimin cilësor të dokumentacionit profesional të paraqitur nga kandidati, Këshilli çmoi ta vlerësojë kandidatin Genti Ibrahimimi me **23, 33 (njëzet e tre presje tridhjetë e tre) pikë**.

### **C. Meritat profesionale – Kualifikimi Shtesë Profesional**

60. Në shkronjën “b” të pikës 2 dhe shkronjën “b” të pikës 3 të nenit 7/a të ligjit Nr. 8577/2000, në shkronjën “b” të pikës 1 të nenit 240 të ligjit Nr. 115/2016, si edhe në vendimin Nr. 5 datë 02.04.2019 të Këshillit të Emërimeve në Drejtësi të nxjerrë në bazë e për zbatim të ligjit, në lidhje me kualifikimin e shtesë profesional, përcaktohen si kritere vlerësimi që kandidatët të kenë veprimtari të njohur në fushën e të drejtës kushtetuese, të drejtave të njeriut dhe në sfera të tjera të së drejtës, vlerësim të dallueshëm të rëndësisë së punimeve akademike, studimeve shkencore, shkrimeve dhe ligjëratave profesionale, botimeve, si dhe pjesëmarrjen në aktivitete shkencore, përvojë të veçantë në një fushë të caktuar të së drejtës, ose këshilltar ligjor i Gjykatës Kushtetuese a Gjykatës së Lartë, si edhe pjesëmarrje të dallueshme në procesin e hartimit ose të konsultimit të legjislacionit dhe çdo angazhim tjetër profesional të kandidatit përgjatë 5 viteve të fundit në fushën e së drejtës.

61. Prandaj, në zbatim të ligjit, në varësi edhe të profileve dhe karrierave profesionale të secilit kandidat, nga totali prej 12 pikësh për këtë kategori vlerësimi, Këshilli i Emërimeve në

Drejtësi vlerëson deri në 8 pikë ekspertizën në të drejtën kushtetuese dhe në të drejtat e njeriut ose ekspertizën në fusha të tjera të veçanta të së drejtës. Gjithashtu, Këshilli vlerëson deri në 4 pikë angazhimet profesionale shtesë të kandidatëve. Në arsyetimin dhe përfundimet e tij Këshilli mban parasysh rregullat e hollësishme të përcaktuara me vendimin normativ Nr. 5 datë 02.04.2019 të këtij Këshilli, si edhe orientimet në përcaktimin e pikëve përkatëse të merituar sipas Metodologjisë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese, të miratuar me vendimin Nr.51 datë 21.06.2019.

62. Në rastin e kandidatit Genti Ibrahim, krahas jetëshkrimit, intervistës dhe motivimit për kandidim, Këshilli shqyrtoi dokumentet profesionale dhe të dhënat që mund të disponoheshin nga veprimtaria e tij profesionale si.....

#### *Specializimi në të drejtën kushtetuese, të drejtat e njeriut ose në fusha të tjera të së drejtës*

63. Për sa i përket kriterit të parë vlerësues, *ekspertizës në të drejtën kushtetuese dhe në të drejtat e njeriut ose ekspertizës në fusha të tjera të veçanta të së drejtës*, nisur nga të dhënat që rezultojnë nga jetëshkrimi, motivimi për kandidim, intervista dhe dokumente të tjera zyrtare mbi rezultate të vlerësimit profesional etj., si edhe nga shqyrtimi i dokumenteve profesionale të paraqitura nga kandidati Genti Ibrahim, Këshillit i rezulton se historiku dhe karriera profesionale e këtij kandidati është i fokusuar në pjesën më të madhe të kohëzgjatjes dhe shtrirjes së saj në fushën e drejtësisë kushtetuese, lirive themelore dhe të drejtave të njeriut.

64. Këshilli vjen në këtë përfundim jo vetëm nga fakti që veprimtaria profesionale i këtij kandidati është e lidhur me ushtrimin e detyrave profesionale si jurist i spikatur, përvojë, e cila, e lidhur edhe me interesin e dëshmuar vetjak profesional, ka ndikuar në formimin profesional dhe specializimin e këtij kandidati në fushat e së drejtës publike, administrative, dhe të drejtave të njeriut.

65. Nisur nga kjo veprimtari profesionale, Këshilli vlerëson se kandidati Genti Ibrahim dëshmon jo vetëm formimin e tij të plotë juridiko-profesional, por edhe se ka arritur një nivel të spikatur dhe të dallueshëm, jo vetëm teorik por edhe të zbatimit e të ndikimit efektiv në praktikë, të specializimit dhe ekspertizës ligjore, veçanërisht të thelluar në fushën e të drejtës kushtetuese, të lirive themelore e të drejtave të njeriut, si edhe të aspekteve të ndryshme të juridiksionit kushtetues.

66. Prandaj, në lidhje me kriterin vlerësues të "*ekspertizës në të drejtën kushtetuese dhe në të drejtat e njeriut*" Këshilli vlerëson ti caktojë kandidatit Genti Ibrahim **7,55 (shtatë presje pesëdhjetë e pesë) pikë**.

#### *Angazhime profesionale shtesë*

67. Për sa i përket kriterit të dytë vlerësues, *angazhimeve profesionale shtesë*, sipas të dhënave që rezultojnë nga jetëshkrimi, motivimi për kandidim, intervista dhe dokumentet e tjera zyrtare të administruara në dosjen e kandidatit Genti Ibrahim, rezulton se është angazhuar si më poshtë:

- Nga aktet e dosjes dhe nga vetëdeklarimet e kandidatit Genti Ibrahim, rezulton se kandidati ka pasur angazhime shtesë profesionale, si Ekspert i nivelit të lartë për Reformën në Drejtësi, për periudhën Janar 2015- Korrik 2016.

68. Prandaj, duke pasur parasysh këtë angazhime shtesë profesionale, të shtrira në kohë dhe me kontribute konkrete profesionale në fushën publike, Këshilli vlerëson që për kriterin vlerësues të “*angazhimeve profesionale shtesë*”, ti caktojë kandidatit Gent Ibrahimimi **3,44 (tre presje dyzet e katër) pikë**.

### **Meritat Morale**

69. Në shkronjën “c” të pikës 2 të nenit 7/a të ligjit Nr. 8577/2000 si kriter vlerësimi është përcaktuar që kandidatët të jenë vlerësuar për “*integritetin etik e moral*”. Po kështu, në shkronjën “a” të pikës 1 të nenit 240 të ligjit Nr. 115/2016 përcaktohen si kriter “*Rezultatet e vlerësimit të etikës së kandidatëve gjatë punës, nëse ka*”, ndërsa në shkronjat “a” dhe “b” të pikës 2 të këtij neni përcaktohen si kriter vlerësimi edhe “*Reputacioni që gëzon kandidati në shoqëri dhe midis kolegëve*” dhe “*cilësitë morale, të tilla si ndershmëria, përpikëria në ushtrimin e detyrave, drejtësia në marrjen e vendimeve, përgjegjshmëria, besueshmëria, paanësia, dinjiteti dhe prirja për të marrë përsipër përgjegjësi*”. Së fundi, në shkronjën “c” parashikohet si kriter vlerësimi edhe “*angazhimi i provuar në ndjekje të kauzave të shoqërisë civile*”. Në bazë dhe për zbatim të ligjit, lidhur me këto kriter vlerësimi, Këshilli i Emërimeve në Drejtësi ka nxjerrë vendimin normativ Nr. 5 datë 02.04.2019 ku përcaktohen rregullime më të hollësishme si edhe shpërndarja e pikëve të vlerësimit sipas peshës specifike të këtyre kriterëve.

70. Prandaj, në zbatim të ligjit, lidhur me meritat morale, nga totali prej 30 pikësh për të tre komponentët vlerësues, Këshilli i Emërimeve në Drejtësi vlerëson deri në 18 pikë *integritetin etik dhe moral*, deri në 10 pikë *reputacionin që gëzon kandidati në shoqëri dhe midis kolegëve* dhe deri në 2 pikë *angazhimin e provuar në ndjekje të kauzave të shoqërisë civile*. Në arsyetimin dhe përfundimet e tij Këshilli mban parasysh rregullat e hollësishme të përcaktuara me vendimin normativ nr. 5, datë 02.04.2019 të këtij Këshilli dhe Shtojcën nr. 1 të tij, si edhe orientimet në përcaktimin e pikëve përkatëse të merituar sipas Metodologjisë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese, të miratuar me vendimin nr. 51, datë 21.06.2019.

71. Në rastin e kandidatit Genti Ibrahimimi, krahas jetëshkrimit, paraqitjes dhe sjelljes gjatë parashtrimeve në intervistë, motivimit për kandidim dhe historikut të komunikimit të kandidates me Këshillin gjatë procesit të verifikimit dhe vlerësimit të kandidaturës, Këshilli i Emërimeve në Drejtësi shqyrtoi të dhënat nga dokumentet profesionale, të aksesueshëm publikisht nëpërmjet të cilave mund të nxirreshin elementë të dobishëm për qëllimet e verifikimit dhe vlerësimit të meritave morale të këtij kandidati.

### **Integriteti etik e moral**

72. Për sa i përket kriterit të parë vlerësues, *integritetit etik e moral*, nisur nga të dhënat që rezultojnë nga jetëshkrimi, motivimi për kandidim, intervista, komunikimi i kandidatit me Këshillin gjatë procedurave të verifikimit dhe vlerësimit, si edhe nga dokumente të tjera zyrtare apo të aksesueshme publikisht, Këshillit i rezulton se kandidati Genti Ibrahimimi në veprimtarinë, sjelljen dhe komunikimin e tij tregon përkushtim dhe angazhim të ndërgjegjshëm në përmbushjen e detyrave profesionale dhe në ushtrimin e profesionit, si edhe vëmendje, ndjeshmëri dhe respekt në komunikim e bisedë, duke parashtruar argumentet e tij me dinjitet, duke dëgjuar dhe përgjigjur me kujdesin e duhur, me durim e vetëpërbajtje përkundrejt qëndrimeve dhe pyetjet të cilat i drejtohen nga bashkëbiseduesit.

73. Nga të dhënat e mundshme në dispozicion, Këshillit nuk i rezultojnë që kandidati Genti Ibrahim i të ushtrojë apo të ketë ushtruar funksionet e tij profesionale duke favorizuar palët të caktuara apo duke kërkuar përfitime për veten apo për të tjerët. Nuk rezultojnë të dhëna që ky kandidat të mos ketë respektuar detyrimin profesional të nderit dhe të dinjitetit, ndërtimit të marrëdhënieve profesionale dhe mirësjelljes në raport me kolegët, profesionistët e fushës, palët e përfshira në çështje pune etj.. Pra nuk ka të dhëna që me sjelljen dhe veprimtarinë e tij në jetën profesionale dhe personale të ketë cenuar apo të rrezikojë të cenojë imazhin dhe figurën publike të gjyqtarit dhe sistemit të drejtësisë.

74. Prandaj, në lidhje me kriterin vlerësues të “integritetit etik e moral” Këshilli e vlerëson kandidatin Genti Ibrahim me **16,88 (gjashtëmbëdhjetë presje tetëdhjetë e tetë) pikë**.

#### ***Reputacioni që gëzon kandidati në shoqëri dhe midis kolegëve***

75. Për sa i përket kriterit të dytë vlerësues “reputacioni që gëzon kandidati në shoqëri dhe midis kolegëve”, nisur nga të dhënat që rezultojnë nga jetëshkrimi, motivimi për kandidim, intervista, komunikimi i kandidatit me Këshillin gjatë procedurave të verifikimit dhe vlerësimit, si edhe nga dokumente të tjera zyrtare apo të aksesueshme publikisht, Këshillit i rezultojnë se kandidati Genti Ibrahim në veprimtarinë, sjelljen dhe komunikimin e tij tregon angazhim dhe përkushtim në përmbushjen e detyrave për zbatimin e drejtë të ligjit sipas kompetencave dhe përgjegjësisë që i ngarkon ligji.

76. Sipas të dhënave që disponohen vërehet se kandidati ka ushtruar me seriozitet, maturi dhe besnikëri detyrimet profesionale në ushtrimin e funksioneve, si dhe reflekton përgjegjshmëri në angazhimet profesionale.

77. Për rrjedhojë, në lidhje me kriterin vlerësues të “reputacioni që gëzon kandidati në shoqëri dhe midis kolegëve” Këshilli e vlerëson kandidatin Genti Ibrahim me **9,66 (nëntë presje gjashtëdhjetë e gjashtë) pikë**.

#### ***Angazhimi i provuar në ndjekje të kauzave të shoqërisë civile***

78. Për sa i përket kriterit të dytë vlerësues “angazhimi i provuar në ndjekje të kauzave të shoqërisë civile”, nisur nga të dhënat që rezultojnë nga jetëshkrimi, motivimi për kandidim, intervista, komunikimi i kandidatit me Këshillin gjatë procedurave të verifikimit dhe vlerësimit, si edhe nga dokumente të tjera zyrtare apo të aksesueshme publikisht, Këshillit i rezultojnë se, përgjithësisht, kandidati Genti Ibrahim ka qenë i angazhuar në veprimtari të tjera të përshtatshme jashtë atyre të lidhura me ushtrimin e detyrës ose të profesionit për ndjekje të kauzave të shoqërisë civile.

79. Prandaj, në lidhje me kriterin vlerësues të “angazhimi i provuar në ndjekje të kauzave të shoqërisë civile” Këshilli vlerëson ti caktojë kandidatit Genti Ibrahim **1,77 (një presje shtatëdhjetë e shtatë) pikë**.

#### **Meritat organizative, drejtuese dhe menaxheriale**

80. Në nenin 240 të ligjit Nr. 115/2016 parashikohen si kritere vlerësimi disa komponentë të lidhura me aftësitë profesionale dhe personale të kandidatëve mbi çështjet e natyrës drejtuese, organizative, të kapacitetit për vendimmarrje, punës në grup, të komunikimit dhe përfaqësimit publik. Kështu, në pikën 3 të këtij neni parashikohen kriteret vlerësuese për kandidatët si më poshtë:

- “a) cilësinë e platformës dhe të vizionit që paraqesin”;
- b) aftësitë e provuara për të marrë vendime dhe përgjegjësi bazuar në përvojat e mëparshme profesionale dhe shoqërore;
- c) aftësitë e komunikimit;
- ç) aftësitë e të punuarit në grup dhe në ambiente multidisiplinore ose multikulturore;
- d) aftësitë e përfaqësimit publik.”

81. Në bazë dhe për zbatim të ligjit, lidhur me këto kriterë vlerësimi, Këshilli i Emërimeve në Drejtësi ka nxjerrë vendimin normativ nr. 5, datë 02.04.2019 ku përcaktohen rregullime më të hollësishme si edhe shpërndarja e pikëve të vlerësimit sipas peshës specifike të këtyre kriterëve.

82. Prandaj, në zbatim të ligjit, lidhur me meritat organizative, drejtuese dhe menaxheriale, nga totali prej 10 pikësh për të pesë komponentët vlerësues të sipërcituar, Këshilli i Emërimeve në Drejtësi vlerëson deri në 3 pikë *cilësinë e platformës dhe të vizionit që paraqesin* kandidatët, deri në 4 pikë *aftësitë e provuara për të marrë vendime dhe përgjegjësi bazuar në përvojat e mëparshme profesionale dhe shoqërore*, deri në 2 pikë *aftësitë e komunikimit dhe aftësitë e përfaqësimit publik*, si edhe me 1 pikë për *aftësitë e të punuarit në grup dhe në ambiente multidisiplinore ose multikulturore*. Në arsyetimin dhe përfundimet e tij, Këshilli mban parasysh rregullat e hollësishme të përcaktuara me vendimin normativ Nr. 5 datë 02.04.2019 të këtij Këshilli dhe Shtojcën nr. 1 të tij, si edhe orientimet në përcaktimin e pikëve përkatëse të merituar sipas Metodologjisë për vlerësimin dhe caktimin e pikëve për renditjen e kandidatëve për gjyqtar në Gjykatën Kushtetuese, të miratuar me vendimin nr. 51, datë 21.06.2019.

83. Në rastin e kandidatit Genti Ibrahim, krahas jetëshkrimit, paraqitjes dhe sjelljes gjatë parashtrimeve dhe bisedës në intervistë, përmbajtjes së motivimit për kandidim dhe historikut të komunikimit të kandidatit me Këshillin gjatë procesit të verifikimit dhe vlerësimit të kandidaturës, Këshilli i Emërimeve në Drejtësi shqyrtoi të dhënat nga dokumentet profesionale, aktet e tjera zyrtare të administruara në dosjen e kandidatit, si edhe çdo të dhënë a dokument tjetër të aksesueshëm publikisht nëpërmjet të cilave mund të nxirreshin elementë të dobishëm për qëllimet e verifikimit dhe vlerësimit të meritave organizative, drejtuese dhe menaxheriale të këtij kandidati.

#### ***Cilësia e platformës dhe të vizionit***

84. Këshilli shqyrtoi përmbajtjen e dokumentit me shkrim, platformës mbi motivimin e kandidimit dhe vizionit të kandidatit Genti Ibrahim lidhur me qasjen dhe qëndrimet e tij mbi rëndësinë dhe aspektet thelbësore të ushtrimit të detyrës së gjyqtarit të Gjykatës Kushtetuese, mbi sfidat kryesore me të cilat është përballur dhe duhet të përballlet Gjykata Kushtetuese në ushtrimin e përgjegjësve dhe kompetencave që i ngarkon Kushtetuta dhe ligji. Gjithashtu, në vlerësimin e këtij kriteri, Këshilli mban parasysh edhe parashtrimet dhe shpjegimet e dhëna nga ky kandidat gjatë intervistës dhe në përgjigje të pyetjeve që iu drejtuan nga anëtarët e Këshillit.

85. Nisur nga dokumenti me shkrim, (platformë e paraqitur pranë sekretarisë së Këshillit me datë 21.10.2022), dhe shpjegimet e paraqitura gjatë intervistës, Këshilli vëren se kandidati Genti Ibrahim paraqiti një nivel të lartë dhe të dallueshëm të njohjes dhe përvojës profesionale në lidhje me rolin dhe pritshmëritë për ushtrimin e funksionit të gjyqtarit të Gjykatës Kushtetuese, si edhe të kësaj Gjykate në mirëfunksionimin e sistemit demokratik,



ndarjes dhe balancimit të pushteteve, shtetit ligjor, respektimit të lirive themelore dhe të drejtave të njeriut dhe në tërësi për zhvillimin ekonomik e social të vendit. Gjithashtu, ky kandidat parashtrroi me maturi, në mënyrë profesionale, çështje dhe problematika aktuale dhe të së ardhmes me të cilat duhet të përballlet Gjykata, etj.

86. Prandaj, në lidhje me kriterin vlerësues “*cilësia e platformës dhe të vizionit të paraqitur*” nga kandidati, Këshilli e vlerëson kandidatin Genti Ibrahimimi me **3 (tre) pikë**.

#### ***Aftësitë e provuara për të marrë vendime dhe përgjegjësi bazuar në përvojat e mëparshme profesionale dhe shoqërore***

87. Lidhur me aftësitë e provuara për të marrë vendime dhe përgjegjësi, Këshilli mbështetet pikësëpari në të dhënat që lidhen me përvoja konkrete nga karriera e kandidatëve në funksione dhe pozicione të cilat kërkojnë dhe tregojnë marrjen përsipër të përgjegjësisve dhe ushtrimin e vendimmarrjes në ushtrimin e kompetencave dhe përmbushjen e detyrave të ngarkuara. Gjithashtu, në vlerësimin e kandidatëve për këtë komponent vlerësimi, Këshilli mban parasysh se ushtrimi i çdo detyre, funksioni dhe veprimtarie profesionale, edhe kur formalisht nuk lidhet drejtpërdrejt me të drejtën/detyrimin për ushtrimin e kompetencës vendimmarrëse, gjithsesi përmban elementë që tregojnë aftësi të provuara ose premtuese për të marrë nisma, për të kërkuar zgjidhje, për të marrë përgjegjësitë si edhe vendimet e duhura e në kohën e duhur sipas përcaktimeve të ligjit dhe në përgjigje të ndjeshmërisë së publikut.

88. Në rastin e kandidatit Genti Ibrahimimi, krahas jetëshkrimit, parashtrimeve dhe bisedës në intervistë, përmbajtjes së platformës dhe motivimit për kandidim, Këshilli i Emërimeve në Drejtësi shqyrtoi të dhënat nga dokumentet profesionale, si edhe aktet e tjera zyrtare të administruara në dosjen e kandidatit, për të evidentuar të dhëna në lidhje me aftësitë e provuara apo premtuese të këtij kandidati për të marrë vendime dhe përgjegjësi edhe në ushtrimin e funksionit të gjyqtarit të Gjykatës Kushtetuese.

89. Këshilli vëren se kandidati Genti Ibrahimimi, në karrierën e tij profesionale, ka ushtruar detyra të ndryshme dhe funksione publike, ku spikat funksioni i kryetarit të Këshillit të Lartë të Prokurorisë.

90. Prandaj, në lidhje me kriterin vlerësues “*aftësitë e provuara për të marrë vendime dhe përgjegjësi bazuar në përvojat e mëparshme profesionale dhe shoqërore*”, Këshilli e vlerëson kandidatin Genti Ibrahimimi me **3,88 (tre presje tetëdhjetë e tetë) pikë**.

#### ***Aftësitë e komunikimit dhe aftësitë e përfaqësimit publik***

91. Aftësitë e komunikimit, në të gjitha format, veçanërisht me kolegët dhe palët, sikurse edhe në përfaqësimin publik e me të tretët, të shprehurit në mënyrë të qartë, lehtësisht të kuptueshme, të matur, me respekt dhe në mënyrë jodiskriminuese, luajnë një rol të rëndësishëm në kryerjen e funksionit të gjyqtarit të Gjykatës Kushtetuese.

92. Nga shqyrtimi i jetëshkrimit, mënyra dhe stili i parashtrimeve me shkrim të platformës, sjellja, mënyra e komunikimit dhe argumentimit gjatë bisedës në intervistë, si edhe nga përmbajtja, strukturimi dhe stili i hartimit të dokumenteve profesionale të administruara në dosjen e kandidatit, Këshilli vëren se kandidati Genti Ibrahimimi zotëron aftësi shumë të mira për të komunikuar me maturi, për të dëgjuar me respekt dhe për tu përgjigjur me profesionalizëm, qartësi e thjeshtësi, me stil dhe gjuhë të pasur në lidhje me të gjitha çështjet

dhe problematikat që vlerëson të trajtohen, ashtu edhe për çështje dhe problematika që ngrihen nga të tjerët.

93. Gjithashtu, pa pasur qëllimin dhe pa marrë përsipër të tregojë se dallohet mbi të tjerët, nga materialet me shkrim dhe nga komunikimi e biseda gjatë intervistës, rezulton se ky kandidat zotëron edhe aftësi të shumë të mira për përfaqësimin publik, pra për të përfaqësuar atë që mendon se është e përbashkët me të tjerë në lidhje me një çështje apo kauzë të caktuar.

94. Prandaj, në lidhje me kriterin vlerësues të “*Aftësitë e komunikimit dhe aftësitë e përfaqësimit publik*”, Këshilli e vlerëson kandidatin Genti Ibrahimimi me **2 (dy) Pikë**.

#### ***Aftësitë e të punuarit në grup dhe në ambiente multidisiplinore ose multikulturore***

95. Gjyqtari i Gjykatës Kushtetuese, për vetë natyrën e këtij funksioni, mënyrës së funksionimit dhe kolegjalitetit të kërkuar në veprimtarinë e vendimmarrjen kësaj Gjykate, duhet të zotërojë aftësitë e duhura për një qasje metodike ndaj punës, si dhe aftësinë për të qenë i përfshirë në punën në grup, me gjyqtarët e tjerë, këshilltarët dhe anëtarët e stafit të Gjykatës. Pjesë e kësaj aftësie është edhe nevoja për t’u përshtatur shpejt me zhvillimet e reja, si edhe ndaj nevojës për tu përfshirë në veprimtari në ambiente multikulturale dhe multidisiplinore gjatë karrierës gjyqësore.

96. Nga shqyrtimi i jetëshkrimit, sjellja, mënyra e komunikimit dhe argumentimit gjatë bisedës në intervistë, si edhe nga dokumentet profesionale të administruara në dosjen e kandidatit, Këshilli vëren se kandidati Genti Ibrahimimi zotëron aftësitë e duhura për të punuar në grup, përfshirë atë për të punuar në ambiente multikulturale dhe multidisiplinore. Prezantimi dhe dokumentet profesionale dëshmojnë se ky kandidat është përfshirë vijimisht në projekte profesionale me kolegë të tjerë, vendas apo të huaj, për realizimin e publikimeve shkencore dhe artikujve profesionalë.

97. Gjithashtu, ushtrimi i funksionit të anëtarit dhe kryetarit të Këshillit të Lartë të Prokurorisë, për vetë mënyrën kolegjiale dhe punën në grup që kërkohet në këtë institucion për përgatitjen e çështjeve për shqyrtim, bisedimin e zgjidhjes së tyre dhe përgatitjen e vendimeve përkatëse, i kanë mundësuar këtij kandidati fitimin e përvojës dhe shprehive të duhura për punën në grup dhe në çështje e situata të larmishme. Zotërimi i këtyre aftësive rezulton i reflektuar edhe në vetë mënyrën e parashtrimit me shkrim të çështjeve në platformën e paraqitur, si edhe në komunikimin e bisedën e zhvilluar me Këshillin gjatë intervistës.

98. Prandaj, në lidhje me kriterin vlerësues “*Aftësitë e të punuarit në grup dhe në ambiente multidisiplinore ose multikulturale*”, Këshilli vlerëson ti caktojë kandidatin Genti Ibrahimimi **1 (një) pikë**.

#### **Vlerësimi përfundimtar i kandidatit**

99. Në përfundim të arsytimit mbi mënyrën dhe shkallën e vlerësimit për të gjitha kriteret ligjore të parashikuara nga ligji dhe të pikëzimit përkatës të treguar më sipër në këtë Vendim, në funksion të procedurave ligjore të përzgjedhjes së gjyqtarit të Gjykatës Kushtetuese dhe për efekt të renditjes së kandidatëve për vendet vakante në të cilat ka kandiduar, Këshillit të Emërimeve në Drejtësi i rezulton se kandidati Genti Ibrahimimi vlerësohet në total me **88,38 (tetëdhjetë e tetë presje tridhjetë e tetë) pikë**.

## PËR KËTO ARSYE:

Në mbështetje të pikës 1 të nenit 125 dhe pikës 1 të nenit 149/d të Kushtetutës, të nenit 7/a, pikës 3 të nenit 7/b dhe pikës 4 të nenit 7/c të ligjit Nr. 8577/2000 “Për organizimin dhe funksionimin e Gjykatës Kushtetuese të Republikës së Shqipërisë”, të nenit 239 dhe 240 të Ligjit Nr. 115/2016 “Për organet e qeverisjes së sistemit të drejtësisë”, si edhe të pikës 67 të të vendimit Nr. 5 datë 02.04.2019 “Për kriteret dhe procedurën e vlerësimit, pikëzimit dhe renditjes së kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, Këshilli i Emërimeve në Drejtësi

## VENDOSI:

1. Vlerësimin e kandidatit Genti Ibrahim me **88,38 (tetëdhjetë e tetë presje tridhjetë e tetë) pikë.**

në lidhje me kandidimin e tij për vendet vakante për gjyqtar në Gjykatën Kushtetuese, të shpallur nga :

a) Presidenti i Republikës, në datën 13.01.2022,

2. Ky vendim publikohet në faqen zyrtare të Gjykatës së Lartë, në pjesën e përcaktuar për Këshillin e Emërimeve në Drejtësi.

**KRYETAR**

**Sokol BINAJ**

